

# dakwah

www.dakwah.com.my

JENDELA PEMIKIRAN UMMAH

28

JUL / OGOS 2015 | SYAWAL / ZULKAEDAH 1436H

Kemelut  
Hati Ali,  
Pedang  
Muawiyah

'Tabayyun'  
Sebelum  
Share dan  
'Forward'

Mualaf  
sebarkan Islam melalui  
*Underground*

HERO  
theclan.com

Mahkota  
Paling Berharga

RM 8.00 SEM  
10.00 SEN / SAK

# FITNAH cyber

**f f** Membawa  
asas kebenaran  
bertembung dengan  
kebatilan, ia akan  
lenyap atau  
habis **jj**

ISSN 0126-5938



9 770126 593007

Malaysia



Kemerdekaan

Hukum

perundangan

Ratakan Menanti Baharu



# Pertingkatkan Dialog Agama Pelbagai Kaum

Oleh SAODAH ABD RAHMAN

Prof. Madya Dr. Saodah Abd Rahman adalah pensyarah di Jabatan Usuluddin dan Perbandingan Agama, Universiti Islam Antarabangsa Malaysia (UIAM)

**P**eristiwa yang berlaku berkaitan dengan isu perkauman yang wujud di dalam negara masa kini perlu ditangani secara hikmah dan bijaksana. Undang-undang dan hukuman bukan merupakan satu cara yang baik untuk mengatasi permasalahan berhubung kait dengan kesilapan dan kejahilan mengenai isu-isu agama. Ketua-ketua agama dalam negara ini perlu memainkan peranan penting bagi meredakan krisis perkauman dan keagamaan yang dihadapi masa kini. Institusi keagamaan perlu dijadikan sebagai pusat untuk ketua-ketua agama lain berdialog dan berbincang.

Ulama dan mufti perlu mempunyai sikap keterbukaan dalam mengendalikan urusan salah faham atau campur tangan masyarakat lain berkaitan dengan perundungan peribadi umat Islam. Penjelasan secara terperinci berkaitan dengan hal ehwal perundungan peribadi umat Islam perlu dijelaskan secara terbuka supaya masyarakat bukan Islam dapat memahami batas-batas kritikan.

Peranan ulama bukan hanya sekadar untuk menentukan hukum-hakam berkaitan dengan urusan keagamaan umat Islam malah mereka juga perlu memainkan peranan penting untuk menghentikan dakyah dan propaganda yang boleh menghancurkan umat Islam secara hikmah dan bukan dalam tindakan yang keras. Tindakan demikian walaupun merupakan satu cara untuk mengatasi dakwah tetapi ia boleh menyebabkan pelbagai risiko yang boleh menjatuhkan imej agama Islam.

## Keterbukaan dalam mengurus salah faham

Sebagai sebuah negara yang dihuni oleh pelbagai bangsa dan agama maka hubungan di antara ulama Islam dan ketua-ketua agama lain amat diperlukan supaya golongan tertentu tidak dapat melakukan pelbagai agenda untuk menghancurkan perpaduan kaum dengan menggunakan isu-isu keagamaan.

Di negara-negara Barat gereja dan persatuan-persatuan Islam dan pelbagai agama bergabung untuk membahaskan isu-isu berkaitan dengan keagamaan. Melalui dialog dan kerjasama dari gereja maka umat Islam dapat melaksanakan undang-undang peribadi mereka secara mudah, malah masyarakat bukan Islam yang sering menghadiri dialog juga mempunyai hubungan yang baik dengan umat Islam serta memahami permasalahan yang dihadapi oleh umat Islam.

Apabila ulama dan mufti menunjukkan sikap keterbukaan dalam mengendalikan urusan keagamaan dengan berkesan, maka mudah bagi masyarakat bukan Islam berinteraksi dengan institusi keagamaan apabila mereka kurang berpuas hati terhadap sesuatu isu. Sikap lunak dan cuba memahami ajaran Islam akan tersemat dalam sanubari mereka. Tindakan yang keras bukan sahaja boleh menggerunkan manusia malah ia juga boleh menimbulkan reaksi yang agresif daripada pihak yang lain.

Dalam konteks ini, jika ulama dan mufti memainkan peranan penting dalam kegiatan dialog maka



persatuan-persatuan bukan kerajaan yang kurang senang hati terhadap kejayaan umat Islam tidak mempunyai ruang untuk memperluaskan propaganda mereka dalam negara dan di luar negara. Krisis perkauman yang dikaitkan dengan keagamaan bukan dianjurkan oleh ketua-ketua agama lain dalam negara ini malah ia merupakan agenda golongan radikal daripada pelbagai bangsa dan kaum dengan tujuan tertentu. Oleh itu, ulama dan mufti perlu memainkan peranan penting untuk menjemput ketua-ketua agama bukan Islam dalam negara ini berbincang dan berdialog secara lunak dan baik.

Melalui perbincangan ini perasaan persefahaman dan kecintaan terhadap negara dan kedamaian dapat dipertingkatkan kerana setiap orang yang beragama mencintai keamanan. Sikap terlalu keras dan gemar menghukum bukan merupakan cara yang baik untuk menyelesaikan permasalahan. Ketua-ketua agama dalam negara ini perlu berganding bahu mendidik dan mengajar penganut mereka supaya menghormati dan memahami sensitiviti keagamaan setiap masyarakat dalam negara ini.

Apabila ulama dan mufti menunjukkan sikap berminat untuk menghubungkan persahabatan dengan ketua-ketua agama lain maka



isu-isu untuk memburukkan imej ulama dengan istilah-istilah yang tidak baik dapat dielakkan kerana propaganda yang disebarluaskan oleh golongan yang kurang senang dengan kejayaan sistem perundangan Islam dalam negara ini akan terbantut.

Kekuatan Islam bukan bergantung kepada undang-undang dan hukuman semata tetapi ia lebih menjurus kepada perundingan dan dialog di antara ketua-ketua agama supaya setiap umat menghormati dan dapat bekerjasama membentuk keamanan dan kedamaian. Kekuatan dalam bentuk hukuman hanyalah merupakan satu kekuatan yang sementara. Oleh itu Amir Temur, salah seorang pemimpin dunia teragung beragama Islam dalam abad keempat belas berkata: "Sembilan daripada sepuluh berkaitan dengan urusan kenegaraan saya atasi dengan pertolongan majlis, kajian dan perbincangan dan hanya satu daripada sepuluh sahaja dengan pertolongan pedang (kuasa)."

## Pergiatkan lagi perbincangan

Permasalahan berkaitan dengan sensitiviti keagamaan hanya dapat diatasi secara dialog dan perbincangan dengan ketua-ketua agama kerana mereka mempunyai pengaruh dan kuasa untuk

menentukan sesuatu perkara berkaitan dengan keagamaan. Mereka diberi kepercayaan oleh masyarakat mereka berkaitan dengan hal ehwal keagamaan. Perbincangan atau dialog dengan ketua-ketua agama perlu dipergiatkan lagi oleh kesemua ketua-ketua agama dalam negara ini supaya peristiwa sakit-menyakit di antara satu sama lain dapat diatasi segera. Tindakan secara keras bukan merupakan satu cara yang bijak untuk memupuk semangat perpaduan dan rasa hormat-menghormati di antara satu sama lain.

Penjelasan dan penerangan berkaitan dengan kepelbagaiannya tradisi dan corak hidup masyarakat beragama perlu diperkenalkan di sekolah-sekolah supaya kanak-kanak dapat memahami perbezaan corak hidup di antara satu sama lain. Ketua-ketua agama perlu berganding bahu memperjelaskan kepada masyarakat mengenai batas-batas kritikan berkaitan dengan undang-undang peribadi setiap masyarakat beragama.

**Ketua-ketua agama perlu berganding bahu memperjelaskan kepada masyarakat mengenai batas-batas kritikan berkaitan dengan undang-undang peribadi setiap masyarakat beragama.**

Apabila kegiatan dialog diperluaskan di peringkat mufti, ulama dan imam-imam bersama dengan ketua agama lain maka setiap ahli masyarakat dalam negara ini dapat memahami dan menghormati di antara satu sama lain. Oleh itu kegiatan golongan tertentu yang kurang senang hati terhadap corak hidup umat Islam dan perundangan Islam dapat dibanteras secara halus dan lembut.

Dialog keagamaan kurang mendapat perhatian masyarakat Islam jika dalam perbincangan dialog tersebut terdapat unsur-unsur propaganda agama seperti cuba mempengaruhi umat Islam supaya menukar agama asal kepada agama lain. Umat Islam tidak gemar jika dialog agama dijadikan sebagai batu loncatan

untuk memudahkan pendakwah agama lain menyebarkan ajaran agama mereka di kalangan umat Islam.

Dalam konteks negara Malaysia, dialog agama kurang menarik perhatian umat Islam kerana terdapat kumpulan dan individu-individu yang menganjurkan dialog tersebut terlalu liberal sehingga mengenepekkan akidah, perundangan peribadi dan budaya umat Islam sehingga sanggup berkompromi dengan agama lain berkaitan dengan hal ehwal ibadah dan ritual. Sedangkan berkompromi dalam aspek ibadah dan akidah kesannya amat dahsyat. Ia boleh menjurus umat Islam menjadi syirik dan murtad.

Dialog agama juga kurang diminati oleh umat Islam jika dialog tersebut diselit dengan agenda politik golongan tertentu. Sikap begini bukan sahaja boleh menyebabkan ia terkeluar dari etika dialog, malah ia juga boleh menimbulkan prejedis dan salah faham terhadap agama lain.

Dialog agama boleh dipertingkatkan jika objektif dialog tersebut jelas dan orang yang menerajui program tersebut memahami konsep dan prinsip dialog keagamaan. Jika dialog agama dijadikan sebagai batu loncatan politik maka dialog tersebut boleh menyebabkan huru-hara dalam negara kerana individu-individu yang terlalu taksub kepada politik akan menggunakan pelbagai agenda untuk mendapat pengaruh politik sehingga mengorbankan prinsip dan ajaran agama. Oleh itu, dalam mengendalikan dialog agama, objektif dan prinsip berdialog perlu dijadikan atas panduan berdialog. 